

Edukimi në Distancë

Kujdesi, Zhvillimi dhe Edukimi në fëmijërinë e hershme për moshën 0 - 6 vjeç



**AKTIVITETET E MUAJIT NËNTOR PËR GRUP MOSHËN
3-4 VJEÇ**

JAVA E PARË

E HËNË – 3 MAJ – Dhurata për shokët dhe shoqet e mia

Dhurata për shokët dhe shoqet e mia

Materialet e nevojshme: Letër tualeti, ngjitës dhe lule nga kopshti juaj apo fije bari.

Zhvillimi i aktivitetit: Të gjithë fëmijët i duan shumë shokët dhe shoqet e tyre dhe një mënyrë për ta shprehur dashurinë është edhe kur ata u falin dhurata atyre, të cilat i punojnë vetë me duart e tyre. Pa harxhuar të holla, me shumë kreativitet dhe dashuri, punoni së bashku me fëmijët tuaj byzylykët me lule. Është shumë e rëndësishme që sot të flisni me fëmijën tuaj duke i thënë: sot eja të punojmë së bashku disa byzylykë për shokët dhe shoqet e tua në mënyrë që t'i tregojmë atyre se sa shume i do dhe sa shume kujdesesh që ata të jenë të lumtur. Tregojini fëmijës fotografinë e mëposhtme dhe shkoni së bashku në lulet e ballkonit apo në bahçen/parkun tuaj në lagje për të marrë pak fije bari dhe nëse keni disa lule të vogla apo gjethe nga pemët e ndryshme, me këto materiale do t'i zbukuroni byzylykët dhuratë. Mbetjet e letrave të tualetit i preni të vogla si në foto, dhe nëse nuk keni letra tualeti përdorni çfarëdo kartoni apo letre sepse mjafton që të ngjisni lulet dhe barin anekënd letrës për t'u dukur si byzylyk. Lejojeni fëmijën tuaj që në këtë aktivitet të përdorë çfarëdo ngjitësi që keni në shtëpi. Me pas dhuroni byzylykët tek shokët dhe shoqet e kopshtit apo të lagjes. Sot është dita e dhuratave, andaj të dhurojmë dhurata të vogla me dashuri të madhe.



E MARTË - 4 MAJ - Palos teshat e dollapit që të jem i kujdesshëm për veten dhe t'i ndihmoj nënës

Palos teshat e dollapit që të jem i kujdesshëm për veten dhe t'i ndihmoj nënës

Materialet që nevojiten: Teshat e fëmijës suaj.

Zhvillimi i aktivitetit: Filloni sot ditën me shumë përqafime dhe dashuri, e po ashtu shpjegoni fëmijës suaj që sot ai/ajo do të jetë ndihmësi më i rëndësishëm në shtëpi. Secili anëtar i shtëpisë sot do t'i palosë teshat e veta dhe do të rregullojë dollapin e vet. Që të jemi të kujdesshëm dhe të dobishëm, fillimisht duhet të ndihmojmë në shtëpi, prandaj fillojmë ditën me palosjen e teshave.

Vendosni disa tesha të thjeshta para fëmijës suaj, pantallona, bluza apo edhe çorape dhe shall në mënyrë që fëmija t'i palosë vetë dhe me aq njohuri sa ka. Mbusheni një shportë me tesha të papalosura dhe kërkoni që fëmija t'ju ndihmojë duke i palosur teshat e veta. Ju inkurajojmë që mos t'i jepni ndihmë të drejtpërdrejtë, ju mjafton vetëm ta motivoni me fjalë duke i treguar që ju besoni se fëmija mund t'i palosë ato vetë, ashtu siç di, nuk ka rëndësi aspak sa mirë apo jo mirë i palos. Më pas fotografoni teshat e palosura dhe tregoni familjarëve, shokëve dhe shoqeve se sa i vyeshëm është fëmija juaj. Kjo do të nxisë zhvillimin e vetëbesimit dhe vetëvlerësimit tek fëmija.



E MËRKURË – 5 MAJ - Ndërtoj kështjellë për lodrat e mia

Ndërtoj kështjellë për lodrat e mia

Materialet që nevojiten: Letra tualeti, ngjyra dhe gërshërë.

Zhvillimi i aktivitetit: Lodrat dhe loja janë pjese e pandashme e jetës së fëmijëve tuaj. Kësaj radhe, së bashku me fëmijët tuaj, duke modeluar fotografinë ndërtoni kështjellën për kukullat apo makinat apo çfarëdo lodre që e pëlqejnë shumë fëmijët tuaj. Të kujdesen fëmijët për lodrat do të thotë që në moshë të hershme t'i mësojnë aftësitë dhe shkathtësitë për kujdes. Çdo gjë në natyrë, në shtëpi dhe familje kërkon kujdes, andaj fëmijët duhet të mësohen të tregojnë kujdes edhe ndaj lodrave të tyre. Me ndihmën e letrave të tualetit, preni ato në forma më të vogla dhe hapni me fëmijët tuaj nga një vijë me gërshërë që kështjella të kapet mes vete. Për ta bërë kështjellën më të bukur, fillimisht ngjyrosini kartonët me çfarëdo ngjyre që keni dhe lejoni fëmijët tuaj të shprehin kreativitetin e tyre duke i zbukuruar me lule apo me çfarëdo ideje që kanë.



E ENJTE - 6 MAJ - Iriqi i vogël nga gishtërinjtë e mi

Iriqi i vogël nga gishtërinjtë e mi

Materialet e nevojshme: ngjyrë apo keçap si dhe laps dhe letër.

Zhvillimi i aktivitetit: Gishtërinjtë e vegjël të fëmijëve tanë i shohim në çdo cep të shtëpisë, mbi tavolina, mbi dollapë dhe kudo nëpër dhomë. Kësaj radhe, këta gishtërinj do t'i përdorim për t'i bërë gjembat e iriqit. Fillimisht vizatoni një iriq dhe gjithë pjesën tjetër të aktivitetit lejojani fëmijës tuaj pasi është shumë i lehtë dhe argëtues. Ngjyrat tempera apo keçapin i vendosni në një enë dhe një furçë që do t'i ndihmojë për ta lyer dorën. Lejojeni që vetë ta lyejë dorën sepse kjo do t'i ndihmojë në koordinimin e duarve të veta. Më pas, duke e parë foton, fëmija të vazhdojë vetë të vendosë mbi iriq gishtërinjtë e vet për të krijuar iriqin.



E PREMTE - 7 MAJ - Makina ime imagjinare

Makina ime imagjinare

Materialet e nevojshme: Karton dhe një laps.

Zhvillimi i aktivitetit: Natyra ka ngjyra të ndryshme në veten e saj, por kësaj radhe do t'i përdorim ngjyrat e natyrës për t'i ngjyrosur rrotat e makinës sonë imagjinare. Të gjithë fëmijët imagjinojnë që kur të rriten të kenë një makinë me ngjyrat që ata vetë i preferojnë dhe me modelin më unik që ekziston. Ejani prindër të dashur kësaj radhe t'u japim mundësi fëmijëve tanë që të krijojnë makinën e tyre imagjinare. Ndiemoni përmes pikave në një karton që ata t'i përcjellin pikat dhe ta vizatojnë një makinë sipas dëshirës së tyre. Tek pjesa e rrotave, hapeni kartonin me ndihmën e gërshërëve në mënyrë që rrotat të marrin ngjyrën dhe materialet që ata dëshirojnë. Nëse kërkojnë, hapini dhe xhamat dhe i pyetni fëmijët tuaj për çfarëdo ideje tjetër që kanë.

Dilni pastaj me fëmijët tuaj në natyrë apo në lagjen tuaj që të eksploronin ambientin dhe të ndërroni ngjyrën e rrotave sipas gjërave që keni në natyrë. Ky aktivitet do të jetë shumë argëtues dhe interesant për fëmijët tuaj.



JAVA E DYTË

E HËNË – 10 MAJ – Globi me lule

Globi me lule

Materialet dhe mjetet: Lule, gjethe, karton dhe ngjyra.

Zhvillimi i aktivitetit: Të gjithë e imagjinojmë një botë me ngjyra dhe një natyrë shumë të bujshme me lule dhe gjethe. Pyesni fëmijët tuaj se çfarë bote imagjinojnë ata dhe si do të kishin dëshirë të dukej bota. Inkurajoni më pas lulet dhe bukurinë e natyrës për t'i treguar atyre që paqja dhe pastërtia vjen nga ambienti i pastër dhe i shëndetshëm, me shumë bimë dhe lisa dhe shumë lule. Preni një karton të rrumbullakët dhe ndani me vija tokën dhe detin duke i dhënë ngjyrat që fëmija juaj t'i ngjyrosë këto pjesë. Në pjesët ku është toka vendosni lulet, barin, dheun dhe çdo gjë që ju shkon në mendje për natyrën dhe që është e mirë dhe e dobishme në natyrë. Lejoni që fëmijët tuaj që në globin e tyre të përdorin degë të ndryshme apo edhe guralecë. Kështu ju do të shihni botën e tyre imagjinare dhe kapacitetin e tyre për të krijuar imagjinatë të shëndoshë.



E MARTË - 11 MAJ - Ushqej zogjtë dhe kujdesem për të gjithë

Ushqej zogjtë dhe kujdesem për të gjithë

Materialet dhe mjetet: Misër, fara apo thërrime buke.

Zhvillimi i aktivitetit: Kafshët i duam, por të kujdesemi për kafshët tregon respektin dhe dashurinë ndaj kafshëve. Andaj, t'i mësojmë fëmijët tanë përmes aktiviteteve të ndryshme të kujdesen për të tjerët. Një letër tualeti mund ta mbështillni me pak ngjitës dhe vendosni mbi të misër, thërrime buke apo edhe fara të ndryshme që mund të keni në shtëpi. Pasi të teren mirë, vendosni disa nga këto që keni punuar nëpër degët e pemëve në oborrin tuaj apo edhe në ballkonin tuaj të banesës. Përcillni me fëmijët çdo orë nëse kanë filluar të vijnë zogjtë për t'u ushqyer dhe se si po pakësohet ushqimi që keni përgatitur për ta.



E MËRKURË – 12 MAJ – Koha është e vlefshme, rregulloj ora për tërë familjen

Koha është e vlefshme, rregulloj ora për tërë familjen

Materialet dhe mjetet: Letër tualeti dhe letra të bardha dhe me ngjyra.

Zhvillimi i aktivitetit: Të gjithë fëmijët e duan kohën që e kalojnë bashkë me familjarët e tyre sepse koha që e kalojnë bashkë është shumë e rëndësishme. Kësaj radhe të punojmë ora për tërë familjen dhe të tregojmë që koha është e vlefshme dhe se kur fillon ora familjare të gjithë do t'i largojmë telefonat dhe të vazhdojmë të luajmë bashkë si familje. Letrat e tualetit i presim më të vogla dhe mbi to ngjisim rrathët e ndryshëm me ngjyra të ndryshme, si të ketë dëshirë fëmija juaj, ashtu vazhdoni punimin e orëve. Më pas pasi i punoni orët si në foto, zgjidhni një kohë të përshtatshme në të cilën mendoni që mund të bëheni bashkë të gjithë. Ajo të jetë ora familjare, dhe vendosni orët në dorë dhe kaloni kohë bashkë me lojë dhe argëtim. Është shumë e shëndetshme për fëmijën tuaj që çdo ditë të keni orën familjare që e kaloni bashkë.



E ENJTE - 13 MAJ - Shenjat e familjes sime në një fotografi

Shenjat e familjes sime në një fotografi

Materialet dhe mjetet: Ngjyra tempera dhe furça.

Zhvillimi i aktivitetit: Aktivitetet familjare janë gjithmonë shumë të pëlqyeshme për fëmijët, por kësaj radhe të lëmë së bashku shenja të këmbëve apo duarve në një fletë ku tregojmë unitetin dhe bashkësinë familjare. Pastaj mund ta mbajmë atë në shtëpi të varur diku në një cep të dhomës.

Babi, mami, gjyshi, gjyshja dhe kushdo që është në familje, të bashkuar t'i lënë shenjat e duarve apo këmbëve. Ju mjafton të keni një karton të madh apo një letër të madhe dhe lejoni që fëmija juaj të vendosë se kush do të lë shenjat e veta në karton. Me ndihmën e furçave dhe ngjyrës lejoni që fëmija juaj vetë t'ju ngjyros duart apo këmbët dhe t'ju ndihmojë në kartonin familjar ku do të vendosni dorën tuaj.



E PREMTE – 14 MAJ – Lisi i dëshirave

Lisi i dëshirave

Materialet dhe mjetet: Kapëse rrobash dhe letër.

Zhvillimi i aktivitetit: Të gjithë kemi dëshira, por fëmijët kanë më së shumti.

Kërkesat e tyre janë shumë të mëdha dhe të shpeshta. Të fillojmë t'u tregojmë fëmijëve tanë që këto dëshira sot do t'i vendosim tek lisi i dëshirave dhe çdo javë do ta hapim nga një dëshirë dhe do ta shikojmë se a mund ta plotësojmë. Duke e pasur parasysh që fëmijët nuk shkruajnë dhe lexojnë në këtë moshë, ne do t'u themi atyre të vizatojnë dëshirën e tyre. Nëse dëshira jonë është të kemi një top, ta vizatojmë topin, ta vizatojmë veturën lodër apo çfarëdo që është dëshira.

Mësoni fëmijët që dëshirat mund të jenë nga më të ndryshmet, si p.sh. shkuarja te daja, shkuarja te tezja apo edhe përqafimi i gjyshes dhe gjyshit. Dëshirat nuk janë gjithmonë vetëm blerja e gjërave, andaj t'i mësojmë fëmijët që këto janë vlerat tona familjare. Nëse keni dëshirë, mund të bëni dëshira edhe ju si familje dhe me ndihmën e kapëseve në letra t'i vendosni në lisin e dëshirave.



JAVA E TRETË

E HËNË – 17 MAJ – Dielli im e ngrohë tërë botën

Dielli im e ngrohë tërë botën

Materialet dhe mjetet: Makarona dhe ngjyra

Zhvillimi i aktivitetit: Vera po vjen dhe fëmijët tanë çdo ditë e më shumë janë të gëzuar për të mirat që na sjell vera. Të vishemi, të dalim në oborr dhe të luajmë me ujë janë gjërat që fëmijët tanë pëlqejnë më së shumti. Pyetjet e tyre për verën zakonisht janë të natyrës: "Kush na ngroh neve kaq shumë? Pse gjatë verës nuk bie shi? Sa zgjat vera?"

Prindër të dashur, i jepni përgjigje secilës pyetje të fëmijëve tuaj sa më konkretisht që mundeni. Ata nuk mund të kenë imagjinatë shumë të zhvilluar nëse i jepni përgjigje shumë të komplikuar, andaj i jepni përgjigje të thjeshta. Këtë aktivitet e filloni duke i treguar fëmijëve që dielli na ngroh gjatë verës më shumë se në stinët e tjera sepse ndodhet më afër nesh dhe në qiell duket me i madh gjatë verës. I thoni fëmijëve: "Eja edhe ne së bashku ta punojmë diellin tonë që na ngroh shumë. Disa makarona filloni t'i ngjyrosni me ngjyrë të verdhë, dhe nëse nuk keni ngjyrë të verdhë, edhe mustarda në kuzhinë mund t'ju ndihmojë në këtë aktivitet. Pak mustardë dhe një brushë ju mjafton për t'i ngjyrosur makaronat të cilat do t'i përdorni në aktivitet. Pasi ngjyrosen, vendosini makaronat në diell që të thahen, dhe kjo në mënyrë që t'i vendosni afër diellit që do ta vizatoni. Më pas, vendosni mbi fletë kapakun e një tengjereje të rrumbullakët dhe fëmija juaj të mundohet ta vizatojë formën e rrumbullakët duke përcjellur në mënyrë rrethore kapakun. Kështu fëmija të vazhdojë të ngjyrosë rrethin e verdhë dhe me pas sikur në fotografinë më poshtë, t'i vendosë rreth me rreth makaronat e ngjyrosura më parë. Ju keni formuar një diell që ngroh gjithë familjen tuaj.



E MARTË - 18 MAJ - Numrat e mi të parë

Numrat e mi të parë

Materialet që ju nevojiten për këtë aktivitet: Shkopinjë për pastrimin e veshëve dhe ngjyra apo keqap

Zhvillimi i aktivitetit: Fëmijët e kësaj moshe akoma nuk fillojnë të mbajnë me dorë lapsin mirë dhe ju lutem mos i detyroni ata të mbajnë lapsin mire, pasi që muskujt e dorës akoma i kanë më të butë dhe nuk arrijne t'i koordinojnë sa për të mbajtur saktë lapsin dhe sa për ta lëvizur saktë atë. Ky aktivitet i ndihmon shumë fëmijëve që të zhvillojnë aftësitë e muskujve të dorës dhe në anën tjetër, duke qene aktivitet atraktiv, do t'i bëjë ata që ta kryejnë aktivitetin deri në fund.

Fillimisht, ju vizatoni numrat mbi fletë të madhe dhe më pas vazhdoni që me ndihmën e pambukëve për pastrimin e veshëve si ne fotografinë më poshtë, të percjellni me ngjyrë numrat që ju i keni modeluar. Nëse nuk keni ngjyrë, përdorni keqapin dhe nëse nuk keni pambuk për veshë, mund të përdorni gishtat e dorës tuaj. Prindër të dashur, nuk është i rëndësishëm materiali që përdorni me fëmijët tuaj, por është e rëndësishme biseda dhe kënaqësia gjatë aktivitetit. Andaj sa më shumë lavdërime dhe motivim, çdo aktivitet do të kthehet në punë të dobishme me fëmijën tuaj.



E MËRKURË – 19 MAJ - Të gjejmë katrorët me forma

Të gjejmë katrorët me forma

Materialet dhe mjetet: Lapsa, ngjyra dhe gjësende në shtëpi

Zhvillimi i aktivitetit: Në një fletë të bardhë vizatoni së bashku me fëmijët tuaj format e blloqeve që keni në shtëpi, nëse nuk keni blloqe, atëherë përdorni disa objekte që keni në shtëpi me forma. Mund të përdorni lugë, pirunë apo edhe pjata të vogla të ndryshme. Qëllimi është të vizatoni ato forma dhe më pas fëmija të gjejë vendet e tyre në fletë duke i organizuar në mënyrë të saktë. Bëjeni këtë lojë me gjyshin, gjyshen, me gjithë familjen në formë gare. Garat i nxisin fëmijët që të motivohen më tej në zhvillimin e tyre.



E ENJTE - 20 MAJ - Insektet e verës

Insektet e verës

Materialet dhe mjetet: Kapëse rrobash, ngjyra dhe gërshërë

Zhvillimi i aktivitetit: Vera është shumë e mire por shumë të mërzitshme gjatë verës janë insektet. T'i shpjegojmë fëmijëve tanë që vera ka edhe insektet, të cilat herë pas here edhe na pickojnë por pickimi kalon. Që të mos e përjetojnë pickimin si shumë të frikshëm, këtë aktivitet të insekteve realizojeni bashkë dhe lejoni që fëmija juaj së bashku me ju të bëjnë aktivitetin e insekteve.

Ju mjafton të keni kapëse të rrobave që i perdorni në shtëpi dhe të vizatoni format e insekteve duke i ngjyrosur bashkë me fëmijet tuaj këto insekte me shumë ngjyra. Kur ngjiten te kapësja dhe në momentin që hapen e mbyllen kapëset, insektet duken sikur hapin dhe mbyllin gojën. Loja me këtë aktivitet bëhet duke vrapuar pas njeri tjetrit dhe duke emituar pickimin e insekteve në lojë.



E PREMTE - 21 MAJ - Të luajmë në oborr me lojë simetrike

Të luajmë në oborr me lojë simetrike

Materialet dhe mjetet: Një çarçaf i bardhë dhe letra me ngjyra

Zhvillimi i aktivitetit: Këtë aktivitet e realizojmë duke e shtrirë një çarçaf të bardhë në tokë dhe mjafton që me një ngjitëse ta ndajmë në katrorë të barabartë sikur në foto. Në këtë aktivitet që luhet në oborr na mjafton të kemi gjëra me ngjyrë të njëjtë dhe loja luhet kështu: Prindi dhe fëmija së bashku zgjedhin nga një ngjyrë: shembull, prindi të kuqe dhe fëmija të verdhë dhe vendosin mbi katrorët e ndarë secili me radhë ngjyrat e tyre. Ata që i vendosin afër afër ngjyrat fitojnë në këtë lojë.

Fillimisht luani me lojën ku fiton fëmija juaj duke ia shpjeguar procedurën dhe më pas vazhdoni edhe duke e sfiduar.



JAVA E KATËR

E HËNË – 24 NËNTOR – Përralla- Ëndrra ime

Përralla- Ëndrra ime

Zhvillimi i aktivitetit: Si çdo ditë tjetër në kopsht, fëmijët flisinin rreth temave më interesante që mund të ekzistojnë në botë. E këtë ditë mësuesja zgjodhi që ne të flasim për ëndrrat tona, ah sa temë e bukur, aq shumë më pëlqeu sa mezi prita të vinte radha ime.

Roi i dëgjonte me vëmendje shokët dhe shoqet duke folur për ëndrrat e tyre, disa dëshironin të bëheshin policë, disa astronautë, një pjesë tjetër edhe mjekë, por ëndrra e Roit ishte shumë e ndryshme prej tyre, ai mezi priste ta ndajë atë me shokët e tij.

Dhe ja erdhi radha, mësuesja thirri Roin, po çfarë ëndrre ke ti? Me shumë entuziazëm filloi: ëndrra ime është më e veçanta, sepse unë ëndërroj të bëhem zog dhe të fluturoj lart tek qielli, dua ta shohë nga afër se sa i bukur është, ta prekë atë me krahë e të ulem në retë e bardha kur lodhem nga fluturimi, kjo është ëndrra ime.

Të gjithë fëmijët e përgëzuan për ëndrrën që kishte Roi dhe filluan edhe ata të ëndërronin gjëra më të veçanta. E kësaj radhe të gjithë së bashku filluan të ëndërronin që të fluturojnë së bashku dhe të shkojnë në vise më të nxehta për të kaluar kohë së bashku.

E MARTË - 25 NËNTOR - Ylberi im

Ylberi im

Materialet dhe mjetet: Letra me ngjyrë dhe pambuk apo palloma shtëpie

Zhvillimi i aktivitetit: Në qiell një dukuri që shumë rrallë e shohim por që fëmijët e duan shumë është ylberi. Shpjegoni fëmijës suaj se kur del ylberi në qiell dhe kur fillon qielli të marrë ngjyra ngjyra. Pasi që ylberi del pas shiut, për shi na duhen retë, prandaj fillojmë fillimisht me retë e më pas vazhdojmë me ngjyrat e ylberit. Sa ngjyra ka ylberi, sa dëshiron fëmija juaj t'i vendosë në ylberin e tij, flisni dhe për çdo detaj të punimit bisedoni me fëmijët tuaj. Retë me palloma ose pambuk me ndihmën e ngjitëses t'i formojmë të buta ashtu siç duken, po ashtu do t'i japim mundësi që me anë të letrave të holla me ngjyra të formojnë ylberin. Çka është më e rëndësishme që nëse nuk keni letra me ngjyrë mund të kërkonit nga fëmija juaj që t'i ngjyrosë fletat një nga një dhe të fitoni një ylber që e vendosni në xhamin e dhomës suaj.



E MËRKURË – 26 NËNTOR- Bowling me shishe të ujit

Bouling me shishe të ujit

Materialet dhe mjetet: Shishe të zbrazëta të ujit apo lëngjeve dhe ngjyra temper.

Zhvillimi i aktivitetit: Shishet e zbrazëta të ujit apo të lëngjeve që i keni në shtëpi t'i përdorim kësaj radhe për lojën e boulingut. Na mjafton të kemi 4 ose 5 shishe të çfarëdo madhësie dhe ngjyrosini ato së bashku me fëmijët tuaj që të duken sikur shishe të boulingut.

Kësaj radhe kjo lojë është më interesante pasi që shishet e ujit do të jenë të mbushura me ujë dhe kjo lojë do të jetë tipike lojë e verës, e cila do t'i kënaqë fëmijët tuaj pasi që sa herë t'i rrëzojnë me top në oborrin apo ballkonin tuaj do të keni shumë ujë dhe shumë buzëqeshje të fëmijëve tuaj.



E ENJTE - 27 NËNTOR - Arkeologët e vegjël

Arkeologët e vegjël

Materialet e nevojshme: Disa monedha parash dhe guralecë apo lodra si dhe një brumë i thjeshtë

Zhvillimi i aktivitetit: Në aktivitetin e sotëm ju duhet që së bashku me fëmijën tuaj të përgatisni një brumë të thjeshtë me ujë dhe miell, por brumi të jetë më i ngurtë. Duke e përzier brumin vendosni brenda brumit bashkë me fëmijën tuaj disa monedha, disa gjethe apo lodra të vogla dhe guralecë. Qëllimi është që fëmija të gjejë sikur në një gërmim arkeologjik gjërat e vlefshme që fshihen brenda brumit. Brumin që e përgatisni bashkë me fëmijën tuaj, nëse koha është me diell, nxirreni jashtë që të teret në diell apo futeni në furrë në një temperaturë të ulët, piqeni për pak minuta sa të forcohet brumi.

Më pas përdorni një lodër më të fortë apo një shkop të fortë për të gjurmuar mbi atë brumë, i cili fsheh brenda vetes shumë gjëra që duhet të gjejnë fëmijët tuaj.



E PREMTE - 28 NËNTOR - Aeroplani im

Aeroplani im

Materialet e nevojshme: Letër dhe një shkop të gjatë

Zhvillimi i aktivitetit: Kësaj radhe e kemi një aktivitet po ashtu shumë të dashur për fëmijët tuaj. *Aeroplani im* është një aktivitet, i cili është shumë atraktiv për fëmijët tuaj, sepse ne kësaj radhe mund ta lëvizim aeroplanin në punim. Ky aeroplan do të shkojë aty ku dëshiron fëmija juaj.

Fillimisht, fëmija juaj ngjyros një letër të bardhë me ngjyrë të kaltër sikur të qiellit dhe në mes e ndajmë një hapësirë të prerë me gërshërë. Në anën tjetër e punojmë aeroplanin në një fletë tjetër, e presim formën e aeroplanit dhe fëmija ngjyros sipas dëshirës së vet aeroplanin. Më pas ngjisni në një karton aeroplanin e vizatuar dhe ngjisni një shkop, i cili do të ju ndihmojë, sikur në foto, ta lëvizni aeroplanin sipas dëshirës suaj.



